

Date – 24/03/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Sorkar hnathawkte office kai chin hriatna tur, Biometric Attendance chu MINECO-ah hman a ni tawh a, sorkar department pisa hrang hrangah dah belh a ni dawn.**
- 2. Tuichawng bialtu MLA, Rasik Mohan Chakma chu MLA atanga ban a nih loh chhan tur sawifiah turin Assembly Speaker Pu Lalbiakzama'n a hriattir.**
- 3. Ni 2 chama Bhutan-a a zin hnuin Prime Minister Narendra Modi-a chu India-ah a lo haw leh tawh.**
- 4. External Affairs Minister Dr. S. Jaishankar-a chuan China-in Arunachal Pradesh a chuh ve chu thil âwm-ang lo a ni, a ti.**



BIOMETRIC ATTENDANCE

Chief Minister Pu Lalduhoma'n sorkar hnathawkte office kai chin hriatna tur, Biometric Attendance chu MINECO-ah hman a ni tawh a, sorkar department pisa hrang hrangah dah belh a ni dawn, a ti.

Chief Minister hian Instagram kaltlangin he thu hi a sawi a; Lailen nen thaw dunin Mizoram sorkar chuan Aizawl Smart City Ltd. kaltlangin Biometrics attendance chu tun thla ni 15 atangin MINECO-ah a hmang ãan, a ti a. Biometrics khawl-ah chuan hmel leh kutzia hmangin attendance dah luh theih a ni a, Office-a thawkte kal hun leh haw hun a inchhinchhiah ang a, chu chu Chief Minister thlengin an lo en thei dawn tih a sawi a. MINECO-ah hian CCTV 70 leh Biometric Device 28 dah tawh a ni tih sawiin Mizoram sorkar Department office hrang hrangah dah belh zel a ni dawn, a ti bawk.

Biometric hmanga office kal leh haw hun endik chungchangah Chief Secretary, Dr. Renu Sharma-i chuan nimin khan thuchhuah siamin uluk taka enzui a ni dawn, a ti a. Department hrang hranga thuneituten Nodal officer pakhat theuh ruatin hei hian kar tin Department hotu hnenah an department hnuaiia staff te kal dan a theh lut thin dawn a, Superintendent te pawh an hnuaiia thawk Group B, C leh D te endik turin Checking Officer an ni dawn tih sawiin Under Secretary hnenah ni tin pisa kal dan an theh lut dawn, a ti bawk.

Thuchhuaha tarlan a nih dan chuan pisa hun laia hmun danga chhuak te chu tha taka chhinchhiah an ni dawn a, pisa vawi 3 aia tam tlai te chu CL ni khat leh a chanve ziahsak an ni dawn a, Department tina hotute chu tha taka an hnuaiia thawk te enkawl turin a ti bawk.

Chief Minister Pu Lalduhoma chuan Assembly Session neih zawh taka thu a sawinaah office kal chhinchhiahna an hman hma leh hman hnuah office kai dan a danglam, a ti a. Biometric attendance chu district level thlenga hman theih tura ruahmanna kalpui mek a ni tih sawiin sum sen a hautak hle a, sum sen vak ngai lo chi department thenkhatin an ngaihtuah chhuah chu an pawm tho, a ti a. Education department-in QR Code hmangin kal chhinchhiahna an siam a, School zirtirtu kal te chhinchhiahna atana school hung chhung china ‘geo-fencing’ an hman pawh a tha hle a ni, a ti.

<><><>

TUICHAWNG MLA SHOW CAUSE NOTICE

Tuichawng bialtu MLA, Rasik Mohan Chakma, Chakma Autonomous District Council (CADC)-a Chief Executive Member (CEM) hna chelh kawp mektu chu MLA atanga ban a nih loh chhan tur sawifiah turin Assembly Speaker Pu Lalbiakzama’n a hriattir.

Assembly Speaker hian Rasik Mohan Chakma hi show cause notice pein CADC MDC, Doymoy Daveng Chakma hnen atangin CADC CEM leh MLA a nih kawp chungchangah complaint a dawn thu a tarlang a. Pu Lalbiakzama chuan CEM leh MLA a nih kawp avanga dan a bawhchhiat thu Rasik Mohan Chakma hi hriattirin, The Mizoram State Legislature Members (Removal of Disqualification) (Amendment) Act, 2006 anga MLA atanga ban a nih loh chhan tur April ni 15 hmaa insawifiah turin a ti a ni.

State Assembly inthlan hnunung ber khan Rasik Mohan Chakma hi CADC CEM ni chungin Tuichawng bial atangin MLA atana thlan tlin a ni a, CEM leh MLA nihna hi a chelh kawp mek a ni.

<><><>

CYMA

Central YMA leh Myanmar ram chhunga Zohnahthlak pawl hrang hrang, Mizorama raltlana awm mek te inkawm chuan ruihhlo tih rem dan tur an sawiho.

Central YMA Committee Room-a nimina inkhawmhonaah hian Mizorama Ruihhlo (No. 4) tam lutuk chungchang leh a tih rem dan tur sawiho a ni a. Myanmar lama Chin unau pawl hrang hrangte nen Mizorama Ruihhlo lo lut thin chu a reh theihna tura theihtawpa tanho ni se, Pawl hrang hrang zingah ruihhloa inhnawnawih an awm a nih chuan tihtawp ni se, an ti a. Chin Hills-a pawl thenkhatte nen ruihhlo chungchang hi la sawiho leh an tum bawk.

Mizorama Myanmar Raltlan awmte chungchang pawh sawihoin, ram leh khawtlang dan tha taka zawm tur leh harsatna siam lo zawnga awm turin an inchah a; hemi chungchangah hian thuchhuah siam ni se, an ti.

Myanmar lama Zohnahthlak unau pawl hrang hrangte inpumkhatna chungchang sawiho a ni bawk a. Inremna leh inpumkhatna a awm zel theih nana theihtawp chhuah turin Central YMA hruaitute chuan an ngen a ni.

Inkawmhonaah hian Myanmar raltlan pawl hrang hrang aiawh mi 42 leh CYMA hruaitu mi 30 vel an tel a ni.

<><><>

LAWNGTLAI MJA

Mizoram Journalists' Association din cham vawi 52-na pualin Lawngtlai District MJA chuan Lairam Christian Medical Centre-ah Poor fund chhun luh pahin Damdawi inin khawl thar a neih thenkhat te an en.

Lawngtlai District MJA hian nimin khan an President Pu Elvis Lalthangzuala hovin infuihtharna hun an hman bakah thawh dunna an neihpui damdawi in, Lairam Christian Medical Centre-ah damdawi ina awm miretheite tanpuina tur sum hi an chung lut a. District MJA President chuan Journalist te chu englai pawha bengchhit reng leh intuaithar ngai an nih vangin chawlh an nei ve lo tih sawiin inthlahdah a thiang lo, a ti a. Lawngtlai Chanchinbu miten sorkar leh mipui thawhpuina tha tak an dawng thin chu MJA Lawngtlai District chuan lawmawm a ti hle a ni, a ti.

Lairam Christian Medical Centre an tlahwnaah hian Hospital Manager Pu V.Lailiankima'n lo dawng sawngin MJA ten Poor fund an hlan chu lawmawm a tih thu a sawi a. Damdawi inin NEC kaltranga tun hnaia khawl thar chi hrang hrang 16, Cheng Nuai 396 leh Sing 9 man an neih thu a sawi a; heng an khawl thar zingah hian CT Scan chu MJA Member te nen an enhova. MJA Member leh an chungte dam loh nikhuua Lairam Christian Medical Centre-a an inenkawlnaah ngaihnathiamna tam tak an dawng thin chu MJA chuan lawmawm an tih thu an sawi.

<><><>

PRIME MINISTER NARENDRA MODI SAYS, HIS TALKS WITH BHUTANESE LEADERSHIP WILL ADD MORE VIGOUR TO INDIA-BHUTAN FRIENDSHIP

Ni 2 chama Bhutan-a Prime Minister Narendra Modi-a zin chu nimin tlai khan Delhi-ah a lo haw leh tawh.

Prime Minister haw tur chu Bhutan lal Jigme Khesar Namgyel Wangchuck leh a tawiawmtu Bhutan Prime Minister-te chuan Bhutan thlawhna tumhmun thleng an thlah a ni.

Vantlang auhmun (Social media)-a a sawi danin Prime Minister chuan Bhutan lal hnen atanga a bik taka chawimawina a dawn thu a sawi a. Bhutan-a a zin chu Bhutan lal leh Bhutan Prime Minister hmu tura hun remchang tak a neih avangin hun hlu bik niin a sawi a. An inkawmnate chuan India leh Bhutan inthianna a thum chak dawn niin a sawi bawk.

<><><>

EXTERNAL AFFAIRS MINISTER DR S JAISHANKAR DISMISSES CHINA'S CLAIMS ON ARUNACHAL PRADESH AS LUDICROUS

External Affairs Minister Dr S Jaishankar-a chuan China-in Arunachal Pradesh a chuh ve chu thil awm ang lo lutuk a nih thu a sawi.

Dr S Jaishankar-a chuan ram dangin an tih vang ni lovin Arunachal Pradesh chu India ram bung khat a ni a ti. Singapore-a South Asian Studies zirna inah External Affairs Minister chuan thu a sawi a. Hemi chungchangah hian India chu a chiang tawk a ni a ti a. China-in Arunachal Pradesh a chuhpui chu thil thar a nih loh thu a sawi bawk.

Pakistan leh India rami buai chungchangah pawh External Affairs Minister chuan tu ram pawhin thenawm ramte nena boruak tha neih an duh a ti a, hemi kawngah hian India chu a vanduai deuh a ni a ti.

<><><>

PUNJAB: DEATH TOLL RISES TO 21 DUE TO CONSUMPTION OF SPURIOUS ILLICIT LIQUOR IN SEVERAL VILLAGES OF SANGRUR

Punjab Sangrur district khaw thenkhata zu chhe in vanga thi chu mi 21 an tling tawh.

Thite bakah hian midang 20 chuang damdawiinah dah an ni a, an zinga thenkhat chu an dinhmun a tha lo ni-a sawi a ni.

Hemi chungchangah hian Election Commission of India chuan Punjab-a Chief Electoral Officer kaldangin Chief Secretary leh DGP-te chu thil awmzia a report turin a hriattir a ni.

Punjab-a zu chhe in chungchang chhui chiang tur hian member 4 awmna Special Investigation Team (SIT) din a ni bawk.

Zu chhe in chungchanga FIR thehluh bawhzuiin police-te chuan mi 8 an man tawh a. State sawrkar chuan zu chhe in vanga thi leh damlote hnena zangnadawmna a pek tum awm thawm hriat tur a la awm lo a ni.

<><><>

WORLD TUBERCULOSIS DAY

Vawiin hi khawvel huapa ngawr natna pual ni bik, World Tuberculosis Day a ni a. Hemi pual hian nimin khan President Droupadi Murmu-i chuan ram mipuite chu TB natna awm lohna rama India siam tura thawkho turin a sawm a ni.

President chuan kumtin March ni 24 chu khawvel puma TB ni atana hman a ni chu lawmawm a tih thu a sawi a. He ni hian mipuite hnena TB natna chungchang puanzar chu a tum a ni.

President chuan he ni hian TB natna thunun leh a inven kawngah mipuite a finchhuah tur thu a sawi a. TB natna hmuhchhuah ran, inenkawl leh inven pawimawhna mite thinlungah a tuh thar dawn a ni a ti bawk.

<><><>